

Celebracion di e 70 Aña di e Fundacion Cultuurfonds Caribisch Gebied (CCG) y Despedida di Lourdes Croes Despues di 30 Aña di Servicio Dedicado

E Fundacion Cultuurfonds Caribisch Gebied (CCG) a celebra cu orguyo su 70 aña, marcando otro decada di contribucion cultural y desaroyo den nos comunidad. Un di e momentonan mas emocional tabata e despedida di Lourdes Croes, cu a dedica 30 aña di servicio voluntario na e fundacion. Su compromiso incansabel y pasion pa preservacion cultural a laga un marca inolvidabel riba e organizacion y riba e comunidad en general.

Fundacion “het Cultuurfonds Caribisch Gebied (CCG)”, antes conoci como “Prins Bernhard Cultuurfonds Caribisch Gebied”, a lansa un campaña pa anuncia nan cambio di nomber. Den e fin di siman di 6 y 7 di september a tene e reunionnan plenario di e directiva pa cai huntu cu Art Week y Art Fair, cual ta un iniciativa cu tambe a conta cu sosten financiero di e fundacion. E reunionnan tabata sigur special pasobra ta e prome biaha cu e presidente nobo, Lionel Janga a dirigi un reunion plenario riba 6 di September. Como punto special, Lourdes Croes, miembro di Aruba y vice presidente di e fundacion a presidi riba e reunion día 7 como su ultimo reunion oficial.

Riba 6 di september a tuma lugar un recepcion chikito den e hof di hotel Astoria na Sanicolas pa celebra y refleha riba e legado di e fundacion, unda tambe a introduci e miembronan nobo di e directiva diario. E celebracion a reuni ex-miembronan di directiva di Aruba, y ex-receptornan di Premio di Cultura, un premio cu ta ser entrega cada tres aña na figura cultural destaca di e isla.

Tabatin discursonan emocional di despedida for di e presidente señor Lionel Janga y e directora di oficina, señora Melanie Slood, kende a comparti su recuerdonan trahando cu “Des,” un miembro cu semper a muestra serenidad y sabiduria den momentonan di reto cu e fundacion a pasa aden. Des ta ser recorda como un lider accesibel y calmo. Tambe e señora Cathelijne Broers, directora di “het Cultuurfonds” di Hulanda, a manda bunita palabranan di despedida pa medio di un video. Miembronan di directiva di CCG a expresa na Des cu por lo pronto nan lo sigui den contacto pa consehonan valioso pa sigui eleva e fundacion.

E organisacion ta avansa cu un imagen nobo y un nomber actualisa, reflehando e mes dedicacion fuerte pa sirbi e tereno cultural di Aruba y otro isla den Caribe Hulandes. Nos ta traha pa bira mas accesibel cada dia pa creativonan y esnan cu ta defende naturalesa, y pa esnan cu ta busca fondonan pa nan esfuerso cultural y conservacion di naturalesa. Nos lo comunica mas intensivo cu nos campo den e dianan cu ta bini y nos ta spera pa sigui yuda nos peticionarionan mas tanto cu ta posibel cu realisacion di nan proyectonan.



Pa mas informacion, por contacta:

Melanie Slood
Chef de Bureau

Helpdesk: +5999 6866266 | Projecten & Subsidie informatie |
werkdagen 8.00 - 12.00

O: +5999 7671584 | Algemene informatie | werkdagen 8.00 - 17.00

E: m.slood@cultuurfondscg.com

W: cultuurfondscaribischgebied.com

A: Kaya Fraternan di Skèrpènè 1, Postbus 4673, Willemstad, Curaçao